



Arkivsaknr: 2025/13984-1
Sakshandsamar: Leni Dale
Avdeling: Helse og omsorg

SAKSFRAMLEGG

Høyring - tenestestruktur for tannhelsetenesta i Vestland 2026-2036

Utvalssak	Utval	Møtedato
	Ungdomsråd	
	Eldreråd	
	Råd for menneske med nedsett funksjonsevne	
	Utval for levekår	
	Kommunestyret	

Kommunedirektøren sitt framlegg til vedtak:

Kommunestyre vedtek høyringsuttalen slik den ligg føre i saksframlegget

Politisk handsaming

Saka skal til uttale i ungdomsråd, eldreråd, råd for menneske med nedsett funksjonsevne

Saka skal til innstilling i utval for levekår

Saka skal avgjerast i kommunestyre

Saka gjeld

Høyringsuttale – tenestestruktur for tannhelsetenesta i Vestland 2026-2036 jamfør vedlegg.

Saksopplysningar

Vestland fylkeskommune har sendt ut *Tenestestruktur for tannhelsetenesta 2026–2036* på høyring. Planen legg føringar for korleis tannhelsetilbodet i fylket skal organiserast dei neste ti åra.

Hovudmålet er å etablere ein framtidsretta, berekraftig og fagleg forsvarleg struktur som sikrar likeverdige tenester i heile fylket.

Planen peikar på behov for færre, men større og meir robuste klinikkar – og ein klarare struktur for samarbeid mellom fylkeskommunal tannhelseteneste og kommunehelsetenesta.

Alver kommune har eit særleg engasjement knytt til framtida for Lindås tannklinikk, som i dag er eit viktig lokalt helsetilbod for store delar av kommunen.

Vurderingsgrunnlag

Alver kommune forstår og anerkjenner at fylkeskommunen står overfor vesentlege utfordringar knytt til rekruttering av tannhelsepersonell, små klinikkar med avgrensa kapasitet og eldre og lite funksjonelle lokale. Kommunen ser at desse faktorane samla gjer det nødvendig med strukturelle endringar i tenesta.

Etter Alver kommune sitt syn er det avgjerande at det etablerast robuste og berekraftige einingar, både fagleg og økonomisk. Slike einingar må ha tilstrekkeleg kapasitet, moderne utstyr, stabil bemanning og høg kompetanse for å kunne levere tenester av god kvalitet.

Kommunen ser derfor generelt positivt på ei omstrukturering av tannhelsetenesta i Vestland fylke, slik at ein oppnår betre ressursutnytting, større fagmiljø og ei meir framtidsretta drift.

Samtidig ser kommunen at klinikkane på Manger og Lindås i dag er relativt små og difor sårbare både med omsyn til bemanning, fagleg breidde og økonomisk drift. Det er difor viktig at framtidig struktur finn ei løysing som gjer det mogleg å oppretthalde eit godt tilbod i regionen, samstundes som ein styrkar fagmiljø og driftstryggleik.

Betydninga av tannhelsetenesta i Alver

Tannhelsetenesta er ein sentral del av det samla helse- og velferdstilbodet.

Lokal tilgjenge på tenesta bidreg til god folkehelse, sosial utjamning og førebygging av meir alvorlege helseproblem. Tannhelse heng tett saman med både ernæring, livskvalitet og deltaking i samfunnslivet.

Lindås og Manger tannklinikk – eit viktig lokalt tilbod

Lokale tannlegesentre har gjennom mange år vore eit stabilt og fagleg godt tilbod i regionen.

Dei har ei gunstig geografisk plassering i Alver kommune, med god tilkomst frå både nord og sør i kommunen. For mange innbyggjarar, særleg barn, eldre, institusjonsbebuarar og personar med særskilde behov, vil auka reiseavstand kunne bli ein reell barriere for tilgang til tenesta. Å oppretthalde lokale tannlegesenter vil dermed bidra til:

- Nærleik til brukarane og reduserte transportutfordringar.
- Lik tilgang på tenester i heile kommunen.
- Tryggleik og kontinuitet i behandling for sårbare grupper.
- Sterk lokal forankring og samarbeid med kommunen sine helse- og omsorgstenester.

Samhandling mellom fylkeskommune og kommune

Alver kommune er positiv til at fylkeskommunen legg vekt på samarbeid og samordning med kommunehelsetenesta. Dette gir moglegheit for felles folkehelseprosjekt, førebyggjande arbeid og tidleg innsats for utsette grupper.

Krav om robuste og fagleg forsvarlege einingar

Kommunen er samd i fylkeskommunen sitt mål om robuste og fagleg forsvarlege klinikkar. Det er fullt mogleg å kombinere dette med eit lokalt tilbod på Lindås, til dømes gjennom:

- samdrift eller fagleg tilknytning til større klinikk i regionen,
- bruk av moderne teknologi (digital diagnostikk, felles journalsystem),
- fleksibel bruk av personell og spesialistressursar mellom klinikkar.

Ei slik løysing vil både sikre fagleg kvalitet og nærleik til brukarane.

Kommunedirektøren si tilråding

Kommunedirektøren meiner at Lindås tannklinikk bør oppretthaldast som ein del av den framtidige strukturen for tannhelsetenesta i Vestland.

Det bør leggjast til rette for at senteret inngår i eit fagleg og organisatorisk samarbeid som gjer eininga robust, moderne og berekraftig.

Kommunen stiller seg positiv til vidare dialog med fylkeskommunen om lokalisering, organisering og samhandling, og ønskjer å bidra til utvikling av ein modell der lokal forankring og fagleg kvalitet blir ivareteke.

Kommunen erkjenner behovet for strukturelle endringar grunna rekrutteringsutfordringar, små klinikkar og eldre lokalitetar, og ser generelt positivt på ei omstrukturering som gir berekraftige einingar med tilstrekkeleg kapasitet, kompetanse og utstyr.

Kommunen meiner at tannklinikken på Lindås bør oppretthaldast som eit lokalt tannhelsetilbod, grunna god geografisk plassering, nærleik til brukarane og eksisterande samarbeid med kommunehelsetenesta.

Saksframlegg er høyringsuttale frå Alver kommune